

欽定舊唐書

卷四
之七

舊唐書卷四

後晉司空同中書門下平章事劉 昫撰

本紀第四

高宗上

高宗天皇大聖大弘孝皇帝諱治太宗第九子也母曰文德順聖長孫皇后以貞觀二年六月生於東宮之麗正殿五年封晉王七年遙授并州都督幼而岐嶷端審寬仁孝友初授孝經於著作郎蕭德言太宗問曰此書中何言爲要對曰夫孝始於事親中於事君終於立身君子之事上進思盡忠退思補過將順其美匡救其惡

太宗大悅曰行此足以事父兄爲臣子矣及文德皇后崩晉王時年九歲哀慕感動左右太宗屢加慰撫由是特深寵異尋拜右武侯大將軍十七年皇太子承乾廢魏王泰亦以罪黜太宗與長孫無忌房玄齡李勣等計議立晉王爲皇太子太宗每視朝常令在側觀決庶政或令叅議太宗數稱其善十八年太宗將伐高麗命太子留鎮定州及駕發有期悲啼累日因請飛驛遞表起居并遞勅垂報並許之飛表奏事自此始也及軍旋太子從至并州時太宗患癰太子親吮之扶輦步從數日二十三年五月己巳太宗崩庚午以禮部尙書兼太子

少師黎陽縣公于志寧爲侍中太子少詹事兼尙書左丞張行成爲兼侍中檢校刑部尙書太子右庶子兼吏部侍郎攝戶部尙書高季輔爲兼中書令檢校吏部尙書太子左庶子高陽縣男許敬宗兼禮部尙書辛未還京六月甲戌朔皇太子卽皇帝位時年二十二詔曰大行皇帝奄棄普天痛貫心靈若寘湯火思遵大孝不敢滅身永慕長號將何逮及粵以孤眇屬當元嗣思勵空薄康濟黎元敬順惟新仰昭先德宣布凱澤被乎億兆可大赦天下內外文武賜勳官一級諸年八十以上賚以粟帛雍州及諸州比年供軍勞役尤甚之處並給復

一年辛巳改民部尙書爲戶部尙書疊州都督英國公
勤爲特進檢校洛州刺史仍於洛陽宮留守癸未詔司
徒揚州都督趙國公無忌爲太尉兼檢校中書令知尙
書門下二省事餘並如故賜物三千段癸巳特進英國
公勤爲開府儀同三司同中書門下三品秋七月丙午
改治書侍御史爲御史中丞諸州治中爲司馬別駕爲
長史治禮郎爲奉禮郎以避上名以貞觀時不諱先帝
二字詔有司奏曰先帝二名禮不偏諱上旣單名臣子
不合指斥上乃從之己酉于闐王伏闕信來朝八月癸
酉朔河東地震晉州尤甚壞廬舍壓死者五千餘人三

日又震詔遣使存問給復二年壓死者賜絹三匹以開
府儀同三司英國公勣爲尚書左僕射同中書門下三
品僕射始帶同中書門下庚寅葬太宗於昭陵九月甲
寅加授鄜州刺史荆王元景爲司徒前安州都督吳王
恪爲司空兼梁州刺史丙寅贈太尉梁國公立齡贈司
徒申國公士廉贈左僕射蔣國公屈突通並可配食太
宗廟庭冬十一月甲子以瑤池都督阿史那賀魯爲左
驍衛大將軍乙丑晉州地又震是冬無雪

永徽元年春正月辛丑朔上不受朝詔改元壬寅御太
極殿受朝而不會丙午立妃王氏爲皇后丁未以陳王

忠爲雍州牧二月辛卯封皇子孝爲許王上金爲杞王
素節爲雍王夏四月己巳朔晉州地又震五月丁未上
謂羣臣曰朕謬膺大位政教不明遂使晉州之地屢有
震動良由賞罰失中政道乖方卿等宜各進封事極言
得失以匡不逮吐火羅遣使獻大鳥如駝食銅鐵上遣
獻于昭陵吐蕃贊普死遣右武衛將軍鮮于匡濟齎璽
書往弔祭六月庚辰晉州地震秋七月丙寅以旱親錄
京城囚徒九月癸卯右驍衛郎將高侃執車鼻可汗詣
闕獻于社廟及昭陵己未尙書左僕射英國公勣固請
解職許之令以開府儀同三司同中書門下三品十一

月己未中書令河南郡公褚遂良左授同州刺史十二月瑤池都督沙鉢羅葉護阿史那賀魯以府叛自稱可汗總有西域之地是歲雍絳同等九州旱蝗齊定等十六州水

二年春正月戊戌詔曰去歲關輔之地頗弊蝗螟天下諸州或遭水旱百姓之間致有罄乏此由朕之不德兆庶何辜矜物罪己載深憂惕今獻歲肇春東作方始糧廩或空事資賑給其遭蟲水處有貧乏者得以正義倉賑貸雍同二州各遣郎中一人充使存問務盡哀矜之旨副朕乃眷之心乙巳黃門侍郎平昌縣公宇文節加

銀青光祿大夫依舊同中書門下三品守中書侍郎柳
奭爲中書侍郎依舊同中書門下三品夏四月乙酉秩
太廟令及獻昭二陵令從五品丞從七品五月壬辰開
府儀同三司及京官文武職事四品五品並給隨身魚
六月辛酉開府儀同三司襄邑王神符薨秋七月丁未
賀魯寇陷金嶺城蒲類縣遣武侯大將軍梁建方右驍
衛大將軍契苾何力爲弓月道總管以討之八月乙丑
大食國始遣使朝獻己巳侍中燕國公于志寧爲尚書
左僕射侍中兼刑部尚書北平縣公張行成爲尚書左
僕射並同中書門下三品猶不入銜中書令兼檢校吏

部尚書脩縣公高季輔爲侍郎九月癸巳改九成宮爲
萬年宮廢玉華宮以爲佛寺閏月辛未頒新定律令格
式於天下冬十月辛卯晉州地震十一月辛酉有事於
南郊戊辰定襄地震丁丑以高昌故地置安西都護府
白水蠻寇麻州命左領軍將軍趙孝祖討平之

三年春正月癸亥以去秋至于是月不雨上避正殿降
天下死罪及流罪遞減一等徒以下咸宥之弓月道總
管梁建方契苾何力等大破處月朱耶孤注於牢山斬
首九千級虜渠帥六千俘生口萬餘獲牛馬雜畜七萬
丙寅太尉趙國公無忌以旱請遜位不許己巳同州刺

史河南郡公褚遂良爲吏部尙書門下三品丙子親祠
太廟丁亥籍于千畝賜羣官帛有差三月辛巳黃門侍
郎平昌縣公宇文節爲侍中中書侍郎柳奭爲中書令
庚申幸觀德殿賜文武羣官大射夏四月庚寅左領軍
將軍趙孝祖大破白水蠻大勃律甲午澧州刺史彭王
元則薨五月庚辰詔以周司沐大夫裴融齊侍中崔季
舒給事黃門侍郎裴澤尙書左丞封孝琰隋儀同三司
豆盧毓御史中丞游楚客等並門挺忠鯁其子孫各宜
甄擢秋七月丁巳立陳王忠爲皇太子大赦天下五品
已上子爲父後者賜勲一轉大酺三日乙丑左僕射于

志寧兼太子少師右僕射張行成兼太子少傅侍中高
季輔兼太子少保侍中宇文節兼太子詹事丁丑上問
戶部尙書高履行去年進戶多少履行奏稱進戶總一
十五萬又問曰隋日有幾戶今見有幾戶履行奏隋開
皇中有戶八百七十萬卽今見有戶三百八十萬九月
丁巳改太子中允爲內允中書舍人爲內史舍人諸率
府中郎將改爲旅賁郎以避太子名冬十月戊戌幸同
安大長公主第又幸高陽長公主第卽日還宮十一月
乙亥駿馬國遣使朝貢庚寅弘化長公主自吐谷渾來
朝十二月癸巳濮陽王泰薨

四年春正月癸丑朔上臨軒不受朝以濮王泰在殯故也丙子新除房州刺史駙馬都尉房遺愛司徒秦州刺史荆王元景司空安州刺史吳王恪寧州刺史駙馬都尉薛萬徹嵐州刺史駙馬都尉柴令武謀反二月乙酉遺愛萬徹令武等並伏誅元景恪巴陵高陽公主並賜死左驍衛大將軍安國公執失思力配流嶺州侍中兼太子詹事平昌縣公宇文節配流桂州戊子特進太常卿江夏王道宗配流桂州恪母弟蜀王愔廢爲庶人已亥絳州刺史徐王元禮加授司徒開府儀同三司英國公勣爲司空三月壬子朔頒孔穎達五經正義於天下

每年明經令依此考試丙辰上御觀德殿陳逆人房遺
愛等口馬資財爲五垛引王公諸親蕃客及文武九品
已上射夏四月戊子林邑國王遣使來朝貢馴象壬寅
以旱避正殿減膳親錄繫囚遣使分省天下寃獄詔文
武官極言得失八月己亥隕石十八于同州之馮翊有
聲如雷九月壬寅尙書右僕射北平縣公張行成薨甲
戌吏部尙書河南郡公褚遂良爲尙書右僕射依舊知
政事冬十月庚子幸新豐之溫湯甲辰曲赦新豐乙巳
至自溫湯戊申睦州女子陳碩貞舉兵反自稱文佳皇
帝攻陷睦州屬縣婺州刺史崔義立揚州都督府長史

房仁裕各率衆討平之十一月癸丑兵部尙書固安縣公崔敦禮爲侍中頒新律疏於天下十二月庚子侍中兼太子少保蔣縣公高季輔卒

五年春三月戊午幸萬年宮辛未曲赦所經州縣繫囚以工部尙書閻立德領丁夫四萬築長安羅郭夏四月守黃門侍郎潁川縣公韓瑗守尙書侍郎來濟並加銀青光祿大夫依舊同中書門下三品閏五月丁丑夜大雨水漲暴溢漂溺麟遊縣居人及當番衛士死者三千餘人六月恒州大雨滹沱河泛溢溺五千餘家癸丑蒲州汾陰縣暴雨漂溺居人浸壞廬舍癸亥中書令柳奭

兼吏部尚書丙寅河北諸州大水七月辛巳有小鳥如
雀生大鳥如鳩於萬年宮皇帝舊宅八月大理奏決死
囚總管七十餘人辛亥詔自今已後五品已上有薨亡
者隨身魚並不須追收辛未吐蕃使人獻馬百匹及大
驢可高五丈廣袤各二十七步九月丁酉至自萬年宮
冬十一月癸酉築京師羅郭和雇京兆百姓四萬一千
人板築三十日而罷九門各施觀十二月癸丑倭國獻
琥珀碼瑙琥珀大如斛碼瑙大如五斛器戊午發京師
謁昭陵在路生皇子賢己未勅二年一定戶

六年春正月壬申朔親謁昭陵曲赦醴泉縣民放今年

租賦陵所宿衛將軍郎將進爵一等陵令丞加階賜物
甲戌至自昭陵於陵側建佛寺庚寅封皇子弘爲代王
賢爲潞王二月乙巳皇太子忠加元服內外文武職事
五品已上爲父後者賜勳一級大酺三日三月營州都
督程名振破高麗於貴端水嘉州辛道讓妻一產四男
壬戌昭儀武氏著內訓一篇夏五月癸未命左屯衛大
將軍盧國公程知節等五將軍帥師出葱山道以討賀
魯黃門侍郎潁川郡公韓瑗爲侍中中書侍郎南陽男
來濟爲中書令兼吏部尚書河東縣男柳奭貶遂州刺
史六月大食國遣使朝貢秋七月乙亥侍中固安縣公